

Aukštā skraidē – žemā krēta

Šeškaus Bladis no Darbienu
Neožmērša dā Žarienu.
Metu tozēna sogaiša,
Vo laimiejē merga raiša!

Lakstē par svieta kap patrakēs,
Pasēpūtēs, isēstatēs –
Vēs ēiškuojē garēntoutas,
Dā i seksa nepardoutas.

Nuors, ronkuovēs atsēraitēs,
Ēr ēiškuojē lietovaitēs,
Bet matā, kas atsētēka, –
Svetēmtautē ons sotēka!

Kap balondis paborkāva
Ēr vaikieli isēgāva.
Nebie Bladiou kor bedingtē –
Tor i patēs anou imtē.

Vuos tik tortā išgarāva,
Pri tievaliu parvažiāva.
Pošū sakās kvēp gēmtēnē –
Ta žemēlē, kor augēna.

Pēmpē ont kopsta gailē klīkē:
„Šērdēis geisma rēk valdītē!
Jēgu kelnēs pasēdiejē,
Ta, žēnuok, ēr nosēdiejē!“

Varlēnie anodo po pēivas,
Vo klietalie – toštēs mēigas.
Jēgo nuori kou torietē,
Tori artē ēr ekietē.

Nuorem mēsuos, nuorem pēina!..
Vēsam ūkie – vēšta vēina.
Ēr ta pati, palēdusi sparnus,
Korkčiuo patuorie kap varna.

Bladis vakštīuo sosēraukēs
Ēr i kopra sosētraukēs.
Svetēmtautē lop jau skūra –
Žmuogus ēiškuos netgi šniūra.

Vo matā, kas atsētēka:
Aukštā skraidē – žemā krēta!
Dabā žmuonis vēsē joukas –
Atsēviērē Bladiou „dongos“!..

Mosint Dieva tēp žadieta –
Vēsē vargstam ont šiuo svieta.
Ronkas krīžmā ka sodiesem,
Toukart žemie paēlsiesem.